

Mesaz a lokazyon La Zournen Enternasyonal Pour Bann Fiy

Mersi Mr. Speaker, pou akord mwan sa loportinite, pou dir 2 mot, la bomaten a lokazyon lazournen enternasyonal pour bann fiy. (The girl child) ki nou pe selebre ozordi.

En lazournen kin ganny dedye pour rekonet potansyel e kouraz nou bann zenn fiy otour lemonn.

Mr. Speaker an Desanm 2011 Nasyon-z-Ini ti adopte en rezolisyon, pou ki le 11 Oktob sak lannen I ganny dedye a bann zenn fiy, pou lemonn selebre zot lakonplisman e rekonnet bann defi ki zot fer fas avek.

E premye lazournen pou mark sa lokazyon, ti ganny selebre son lannen answit ki ti le 11 oktob 2012.

Ki fer ozordi le 11 i fer egzakteman 11 an depi ki lemonn pe dedye sa lazournen pou rekonnet bann rev e laspirasyon, nou bann zenn fiy.

E sa i en loportinite pour nou osi selebre lakonplisman nou bann zenn fiy Seselwa.

Sa lannen, 2023 nou pe selebre sa gran zour anba sa tenm “Envestir dan devlopman zot konpetans pou dirize e pou asir zot byennet.” Tout an rekonesan ki zot talan I tenir lakle pou batir en lemonn pli ekitab e zis, akoz se zot larsitek nou fitir.

Mr. Speaker,

Ozordi, bokou lanfaz pe ganny mete, par bann lorganizasyon Enternasyonal e Rezyonal parey SADC, UNIFEM, LINYON AFRIKEN, e lezot, lo lenportans protez bann drwa e promouvwar lavenir nou bann zenn fiy.

Nou bezwen investir dan zot par asire ki zot ganny :

- akse avek ledikasyon pli o-nivo,
- akse avek swen lasante,
- Loportinite egal, pou partisip dan bann desizyon ki ganny pran o pli o nivo, pour ki zot lavwa I ganny tande e i fer sa diferans.

- I enportan ki zot osi benefisye egalman pour sa travay e zefor ki zot fer.

Sa i vedir ki nou bezwen kontinyelman, kas tou baryer ki met retar zot progre, e donn zot tou lankourazman pou akonplir zot potansyel.

Mr. Speaker, par kont I tre enportan pou touzour gard nou bann fiy lo sa bon direksyon pour zot byennet e osi pour byennet lasosyete. I nou devwar koman adilt, pou gid zot, e remet zot lo bon semen ler nou vwar zot pe deroute, pou asire ki zot vin sa “role model” ou legzanp pou enspir lezot zen fiy.

Annou pran konsyans e realize ki bann zenn fiy i nou fitir, alors nou bezwen gid e diriz zot dan san direksyon ki nou ti ava kontan vwar zot ale.

I enportan ki nou ankouraz nou bann fiy pou angaze e egzers bann rol kle depi en tre zenn az, ki swa dan lakominote, kot lekol, dan spor, ou menm lo bann lezot platform pour bann zenn, akoz par nouri zot bann abilite, zot kapab vin bann fitir akter sanzman, e annan pozisyon pou partisip dan bann desizyon e defann zot lekor ensi ki lezot.

Pour sa enn ki ganny enspire pou vin en fitir politisyen, loportinite I la pou ed pourswiv son desir.

Nou bezwen touzour kree en lanvironnman kot nou bann zenn fiy I santi ki zot an sekirite e alez kot zot kapab progrese san diskriminasyon, e san bann lezot pratik imoral,

kot napa okenn labi ou sexual harassment, ki anpes zot partisipe

Zot lasante mantal, (en lazournen ki nou fek selebre yer) I enportan, osi byen ki zot lasante fizik, psikolojik e emosyonnel I bezwen kontinyen ganny swiv afen ki I ava permet zot pou vin bann endividi konfidan e rezilyan.

Annou sezi sa lazournen ozordi kin ganny dedye a bann zenn fiy (the girl child) pou re-afirm nou langazman pour protez bann drwa e byennet nou bann fiy.

Annou selebre e reflekte, lo progre ki nou'n fer dan lavansman zot bann drwa, direksyon e byennet.

E osi pran kont bann travay ki nou bezwen fer pou kontinyelman anrиси zot anbisyon e realiz zot bann rev e fer ki zot lavwa I ganny ekoute.

I enportan ki nou travay, ver kre en sosyete kot nou bann zenn fiy I ganny valorize e zot dignite I ganny respekte.

Fodre pa zanmen nou bann zenn fiy I ganny eksplwate e zot drwa I ganny abize, zis akoz zot vilnerabilite ou febles.

Mr. Speaker, pou terminen Mon oule dir ki isi Sesel osi ki aryer, bann zenn fiy I form en gran parti nou popilasyon, e zot devret pe ganny ankouraze pou pran bann pozisyon kle, pou dirize, e pou enspir lezot fiy dan lasosyete, pou vin bann fitir lider.

Wi, zot kapab e zot annan sa abilite e potansyel pou anmenn sa sanzman pozitiv pou fer sanzman, lo bann desizyon, ki enpakte lo zot lavi toulezour, e fer bann kontribisyon pozitiv dan zot kominote, e dan lasosyete an zeneral.

Pour sa rezon ki zot pa devret zanmen ganny kit deryer, me plito annou atrap zot lanmen, e fer zot sot sa pli gro laroul, e grenp sa pli o montanny,

Avek sa 2 mo Mr. Speaker, mon oule swet tou bann zenn fiy, en bon lazournen ozordi, e mon remersye ou.